

29898  
210



掌銓題稿

卷二十五之二十六  
叅處部省





掌銓題稿目錄

卷之二十五

覆給事中舒化叅郎中孫大霖疏

覆山西撫按并查盤御史交叅員外席上

珍疏

覆科道官叅員外包大燿等疏

覆御史蘇民望叅不到官員疏

覆科道官叅尙寶司司丞岳相疏

覆保定巡撫宋纁叅進士孫鳴鳳疏



覆南京戶部尙書曹邦輔叅主事張振選  
疏

覆巡視科道叅兵馬袁謙疏

卷之二十六

覆科道交叅僉事譚啓疏

覆給事中光懋叅兵備副使宋豫卿等疏

覆給事中章甫端叅提學副使林大春疏

覆都給事中光懋叅知州等官張求可等

疏

覆南京科道交論江西科場大變叅提學

副使陳萬言等疏

覆給事中賈三近叅官疏

覆巡城御史王元賓緝獲鑽刺犯人孫五

等疏

覆給事中宋之韓叅官疏

覆給事中周芸叅官疏



掌銓題稿卷之二十五

覆給事中舒化叅郎中孫大霖疏

該刑科都給事中舒化等題叅刑部山西

司郎中孫大霖職掌刑名心藏穢濁王黨

死有重寃竟以二千之賄而不白陳憲身

爲猾吏乃以八百之數而不言以張祿老

二爲知心廉隅不立以王爵李校尉爲奇

貨苞苴盛行贓跡數多官箴大壞乞要罷

斥等因奉



聖旨該部看了來說欽此欽遵抄出送司查得見行事例凡官員貪者革職爲民案呈到部看得孫大霖立志粗鄙行已卑汙鞠獄納賄於西曹恤刑遺羞於東省旣經該科叅奏前來委難容于

清明之世合候

命下將本官照依貪例罷斥爲民等因隆慶四年三月初十日題十二日奉

聖旨孫大霖着爲民

覆山西撫按并查盤御史交叅員外席

上珍疏

該提督鴈門等關兼巡撫山西地方都察院右僉都御史石茂華題稱原任總理邊關糧儲戶部員外郎今陞永平府知府席上珍凡填給商人鹽引勘合每道索銀四兩商人鹽糧該上本色告上拆色本官罰銀五百餘兩仍以本色出給實收虧損錢糧數多事發按察司將商人李陽武等見



行提問商人安承宗等節年拖欠各倉糧  
豆共一萬二千五百石草九萬一千四百  
束穀一十四石席椽籤椿銀一百四十九  
兩各商私通關節送銀六百兩隨行查豁  
至於支放錢糧任意尅減官常掃地相應  
罷斥仍行戶部備行接管主事將商人安  
承宗等節年拖欠各倉前項糧豆草席椽  
籤椿銀照數嚴限追收以克軍需其商人  
李陽武等所犯嚴催按察司查照原卷提  
究等因又該巡按山西監察御史饒仁傑  
巡按山西等處監察御史武尙賢各題參  
前事俱奉

聖旨吏部知道欽此欽遵看得席上珍叨司邊  
餉罔念官箴當此軍

國匱乏之時忍爲身家溫飽之計贓跡旣露  
清議難容安承宗李陽武等久慣積商屢  
行告擾數年之徧計未逞一旦之錢神遂  
通若不嚴懲何由示警旣該撫按官交章



叅劾前來相應依擬題

請合候

命下將席上珍照貪例爲民安承宗等咨戶部  
轉行接管主事李陽武等資都察院轉行  
巡按御史各照原欠錢糧數目勒限追併  
究遣施行等因隆慶四年十二月二十四  
日題二十六日奉  
聖旨是席上珍着革職爲民

覆科道官叅員外包大燿等疏

該禮科都給事中張國彥陝西等道監察  
御史舒鰲等各糾劾刑部廣東司員外郎  
包大燿順天府治中張德恭各於

太廟陪祀放肆不恭乞要重加懲處等因奉  
聖旨吏部知道欽此欽遵爲照

宗廟

朝廷乃禮法森嚴之地人臣於此卽無心失  
錯亦屬有罪而况肆無忌憚者乎近來  
朝儀不肅雖屢奉



聖旨切責尙未甚見整飭而

太廟之中仍復如此則人之怠縱可知也大燿張德恭當陪祀之時偶語不已玩弄有聲乃是肆無忌憚比之無心失錯者不同若不重加懲處何以警示有位合侯

命下將包大燿張德恭降調外任以爲臣工不恪者之戒隆慶五年四月初十日題奉

聖旨包大燿張德恭都着降一級調外任

覆御史蘇民望叅不到官員疏

該貴州道監察御史蘇民望等題稱要將

冊立侍班不到官員

勅下吏部罰治并將

陞殿糾儀事體詳加酌議等因奉

聖旨該部知道欽此欽遵除申定

朝儀已經禮部議覆外爲照

冊封大禮侍班官員不到數多本屬怠肆法難輕貸但各官於當日旣已退朝經今日久難以記憶縱令糾舉當是誰何况吏部止



統文官而不到之官文武皆有豈以吏部亦糾舉武官乎又豈以糾舉不到止在文不在武乎事屬難行相應題

請伏望

皇上將前侍班官姑免查治

勅下禮部嚴責各糾儀官以後務要遵奉近日

題奉

欽依遇朝參官少卽行糾奏如或不言聽其從重叅究慶責任有定而推委者無所施法令必行而怠肆者有所畏隆慶五年五月十四日題十六日奉

聖旨是

覆科道官叅尙寶司司丞岳相疏

該兵科給事中烏昇工科等衙門給事中等官張博等各糾劾尙寶司司丞岳相於禁地擅刑指揮乞要將本官懲處罷斥或姑容降調等因奉

聖旨吏部知道欽此欽遵爲照



禁秘非用刑之地指揮非擅刑之官而岳相  
敢於作威肆無忌憚據其違法本當從擯  
斥之科論以因公似宜在調用之列既經  
各科道官叅論前來相應議處合無將岳  
相調外任用亦足以當罰而示懲隆慶五  
年九月初五日具題初七日奉

聖旨是

覆保定巡撫宋纁叅進士孫鳴鳳疏

該巡撫保定等府兼提督紫荆等關都察  
院右僉都御史宋纁叅論通政司辦事進  
士今出差孫鳴鳳需索驛遞擅用非刑乞  
要發回原籍使之涵養改過撫按具

奏起用等因奉

聖旨吏部知道欽此欽遵爲照進士孫鳴鳳初  
承委解不能嚴束下人令其騷擾驛遞反  
用刑過當虛打無辜以致都御史宋纁叅  
劾前來法當重究但本官初入仕途似難  
遽棄相應酌處合候



命下將孫鳴鳳侯取選到日降一級外任用以爲浮躁之戒隆慶五年十月十七日題十九日奉

聖旨是

覆南京戶部尙書曹邦輔叅主事張振

選疏

該南京戶部尙書曹邦輔題稱管倉主事張振選素乏材能不諳事體聽信在倉下人作弊將在倉囤頭尙錦等三十九囤除正價外多勒索銀三十九兩歇家潘序索要張聰等米四十二石又假指船戶驢頭脚價除正價外多勒索銀近四十兩及在倉門首小歇家傅志等又勒索米二十一石正糧不多而勒索使用銀甚多被張聰等連名狀告准批東城問報解審問據張聰等口稟張主事昨惟小的告狀責打明日還要責治臣乃與伊同叅主事鄭孔道說你傳與張主事今張聰等告實勿要惟



他乃張聰等以東城官問追完糧足掛欠之數往稟上納豈意逢彼重怒又責打十五板雖打告人張聰實忿臣先令鄭主事與彼說勿再打告人之意臣卽不才忝爲堂官又明示告實無罪之人乃旣打復打則臣有何顏面立於衆官之上而不行叅劾乞

勅下吏部再加查訪如果臣言不妄將張振選罷斥以爲庶司不職者之儆等因奉

聖旨吏部知道欽此欽遵爲照上下之分定而後紀綱立政令行乃近年以來屬官不奉堂官約束其在外省則推官知縣出自甲科者二司多不敢約束而反畏之上下之倒置甚矣上下倒置則紀綱何由立而政令何由行也以求其故皆因先年執政之臣悅人媚已於是儉夫之在庶寮者托爲與援入其幕中般闖是非堂官少不曲意於已輒行排陷而遂因以不利於是堂官



畏之不敢行其約束而屬官者則益恣其胸臆旁若無人自稱風采焉習以成風彼此相效雖未必有與援者亦皆以違拘堂官爲得計而安意承行者蓋鮮矣其在外省則由巡按御史見得進士推官知縣有科道之望乃曲加護庇引爲私人托其查訪凡二司之賢否悉出唇吻有所不悅遂以萋菲而禍終不免於是二司反皆畏懼遇其來謁每每留飲幕中親陪談笑以結其懽心蓋奉承之不懈而又何敢問其政事之得失乎今臣秉持公道門無私交庶官旣不敢般鬪是非而又每申明上下之分使諸司不得違越往日之風似亦稍息但積習旣久卒難盡變而以違拘爲得計者固尙有也至於外省則全是舊習無一人之不然矣體統旣乖法度盡廢害政莫甚於此若不重加懲劄嚴行禁約此風何日止也今南京戶部河南清吏司主事張



振選縱下人需索不能禁制反刑受害者  
以怙終蒙堂官戒示不行悔罪仍刑受害  
者以洩忿非惟執迷不返官守有虧抑且  
長惡不悛名分大壞此正所謂以違拘爲  
得計者也既經南京戶部尙書曹邦輔參  
論前來相應重處合候

命下將張振選革職冠帶閑住本部仍移咨都  
察院通行兩京直隸十三省大小衙門今  
後敢有屬官抗違上官者俱照張振選處  
分上官有自降禮體欵曲屬官平日不能  
督率有罪不行糾治者以不職論其各巡  
按御史皆當以公正爲心不得仍庇進士  
推官知縣引爲私人使各盡其上下之分  
違者聽本部都察院及科道官叅奏究治  
庶久塗之耳目可開而久紊之法紀可振  
其有裨於治道良非細也等因隆慶六年  
三月初六日題初八日奉

聖旨張振選着革了職冠帶閑住近來屬官不



受約束上官不行糾治反爲曲悅名分倒置  
政體大壞這所奏便行內外衙門一體戒飭  
以後再敢有這等的部院科道官着實叅來  
重治不饒

覆巡視科道叅兵馬袁謙疏

該巡視京營禮科等衙門左給事中等官  
烏昇等叅劾南城兵馬司副指揮袁謙逞  
酒刑杖無辜乞要重加降調等因奉

聖旨吏部知道欽此欽遵爲照兵馬副指揮袁  
謙深夜醉歸旣欠檢束妄刑無罪又屬縱  
恣旣該科道官叅劾前來本當重究但兵  
馬有地方之責而於巡軍亦有上下之分  
使因擅責遽行降調又恐下人因而蔑視  
官司以後難於行事相應議處合候

命下姑將袁謙降俸一級亦足示懲等因隆慶  
六年三月初四日題初六日奉

聖旨是



掌銓題稿卷之二十五終

掌銓題稿卷之二十六

覆科道交叅僉事譚啓疏

該吏科左給事中光懋題接得雲南按察司僉事譚啓一本復論原任揚州府知府今聽降調衛東楚賊跡較著仍盡本法等情臣不勝駭異查得譚啓已於隆慶三年自御史陞雲南僉事矣不得復行御史糾劾之事所論衛東楚已自奉有

明旨矣不當更起申明訐擾之端妄誕無忌謬



兵不經事屬乖違法當叅究乞將譚啓照  
依浮躁事例降調別用以示狂妄之戒等  
因又該巡按直隸監察御史王友賢題稱  
原任浙江道監察御史今陞雲南按察司  
僉事譚啓奏辯揚州府知府衛東楚侵欺  
有跡必欲盡法究處不過以已見爲是而  
以公論爲非事已勘明重復瀆擾乞將譚  
啓從重降罰以爲人臣肆言無忌偏挾瀆  
擾者之戒等因俱奉

聖旨吏部知道欽此欽遵通抄送司案查隆慶

二年六月內該巡按御史譚啓論劾揚州  
府知府衛東楚侵匿稅銀乞要褫職提究  
該本部行據監察御史王友賢勘問得衛  
東楚並無侵欺銀兩止是因公那移擬罪  
納贖降調別用已該本部依擬覆奉

欽依轉行欽遵外又查得本部見行事例凡京  
官浮躁者降一級調外任通查案呈到部  
看得吏科左給事中光懋巡按直隸監察



御史王友賢各題叅原任浙江道監察御史今陞雲南按察司僉事譚啓輕舉妄動追許往事偏執求勝肆言無忌乞要照依浮躁事例降調別用及譚啓題叅原任揚州府知府今聽降調衛東楚侵欺賊跡仍要俯照前

旨革職追問各一節除衛東楚已經勘明及奉欽依降調難以別議外爲照原任監察御史譚啓巡歷一方日擊吏治較之風聞言事者不同昔日奏事不實已犯

憲綱今日反覆求勝更屬舛謬旣經科道官叅奏前來相應議處合候

命下將本官仍以原職照浮躁事例降調外任等因隆慶四年三月初一日題初三日奉聖旨譚啓依擬降調

覆給事中光懋論兵備副使宋豫卿等

疏

該吏科都給事中光懋等題稱霸州兵備



副使宋豫卿守尋常之尺寸之揮霍之良才無益地方所當降用天津道兵備副使周希哲受河岸之擲金索屬邑之餽送輒閣誤事執拘戕民相應罷職或降級別用以示曲全仍欲因二臣以示例甄別衆官猷望方新者久任責成俟其果有成績則超遷巡撫以示優異等因奉

聖旨吏部知道欽此欽遵爲照

畿輔乃根本之地兵備係禦盜之官方今天津霸州等處詳盜縱橫商民不安兵備官委難辭責所據副使宋豫卿兵備未宜尙堪別用周希哲頗招物議難以照常處分既經該科叅奏前來相應議擬合候

命下將宋豫卿改用周希哲降調遺下員缺另擇才幹官員銓補至於各省兵備職掌地方城池兵馬錢糧關係甚重容臣等訪其廉斂有爲實心綏輯者令其久任待著有

成績題



請超遷以示獎勸其才力不堪者另行議處如  
有飾名釣譽無裨

朝廷實用者照例罷黜通移咨都察院轉行  
各處撫按衙門遵照施行等因隆慶四年  
四月初七日題初九日奉

聖旨是

覆給事中章甫端劾提學副使林大春  
疏

該禮科左給事中章甫端題稱浙江按察

司提學副使林大春濫厠文衡之任敢踰

詔格之常如聖賢經傳章各有旨也大春乃妄

自割裂組織以爲題目如子在齊聞詔合

何必公山氏之之也子曰夫召我者而豈

徒哉如有用我者吾其爲東周乎衛君待

子而爲政子將奚先至奚其正晏平仲善

與人交久而敬之楚狂接輿歌而過孔子

曰鳳兮鳳兮何德之衰問子西曰彼哉彼

哉通爲一題孟武伯問子路仁乎子曰不



知也又問子曰由也千乘之國可使治其  
賦也不知其仁也求也何如子曰千室之  
邑百乘之家可使爲之宰也不知其仁也  
合季子然問仲由冉求可爲大臣與子曰  
吾以子爲異之間所謂大臣者以道事君  
不可則止今由與求也可謂具臣矣季氏  
旅於泰山季氏將伐顓臾通爲一題孟子  
曰禹稷顏回同道禹思天下有溺者由已  
溺之也稷思天下有饑者由已饑之也是  
以如是其急也禹稷顏子易地則皆然合  
孟子曰曾子子思同道曾子師也父兄也  
子思臣也微也曾子子思易地則皆然曰  
然則有同與曰有得百里之地而君之皆  
能以朝諸侯有天下行一不義殺一不辜  
而得天下皆不爲也是則同曰敢問其所  
以異曰宰我子貢有若智足以知聖人污  
不至阿其所好宰我曰以予觀於夫子賢  
於堯舜遠矣子貢曰見其禮而知其政聞



其學而知其德由百世之後等百世之王  
莫知能違也自生民以來未有夫子也有  
若曰豈惟民哉麒麟之於走獸鳳凰之於  
飛鳥泰山之於丘垤河海之於行潦類也  
聖人之於民亦類也出於其類拔乎其萃  
自生民以來未有盛於孔子也合爲一題  
他如君子有三樂一章合廣土聚民一章  
爲一題回也其心三月不違仁合仁者壽  
爲一題居則曰不吾知也一條合莫已知  
也斯已而已矣是知而其不可爲之者與  
爲一題孔子行合齊人歸女樂一章爲一  
題其他題目大都類此夫課士必以經書  
論策乃見全場大春每試旣不出經矣又  
面論生員不須作論其所執以品題諸士  
者惟四書一義而已乃又破碎經旨析章  
摘句如此則是上之所以試士與士之所  
以待試者等瑟相左甚矣况又聞其試士  
也日進二場辰入者午出未入者酉出促



迫如此故案首恒止於一篇其閱卷也暗帶各處生員如温州趙徽勅處州張本瀾假借如此故關節潛通乎阿堵查得大春素亦頗有虛名故由僉事超遷憲副今乃如此者蓋由其知識荒於酒色精神疲於校藝耳不思

朝廷設文衡清貴之職畀以教化育才之任將冀其樹才賢而興至治也今所行謬妄若此誠恐士相效尤經學日壞其流之弊不止於文體之不正而已將率天下而習於索隱探奇離經畔道者必自大春始矣有臣如此可使爲士之師表哉參照浙江按察司提學副使林大春年未甚衰志則已旣割經裂傳敢作聰明以亂舊章自用自尊豈書同文而遵

王制取舍不協輿論致有目如瞽之譏施爲大拂群情來宜還故土之請假歌詩而留童生以狎戲卽令入學是可爲也縱宴飲



而托門生以閱文因行苞苴罪孰大焉卽其疎狂謬妄難免鰥曠之愆畀以養士育才豈堪作人之範伏乞

勅下吏部將林大春速

賜罷斥以爲憲臣不恪之戒或量降調閑散以全器使等因題奉

聖旨吏部知道欽此欽遵爲照提學之官所以教育賢才表正風俗命題試士

累朝既有成規正已率人

勅諭又所備載而林大春者乃敢變亂

國制而割裂聖經誠爲壞法干紀淫狎生徒而交通苞苴尤爲傷化敗倫實名教之所不容

王法之所不貸旣經左給事中章甫端叅奏前來相應議處合候

命下將林大春照不謹事例冠帶閑住遺下員缺另行銓補再照提學之官昔皆慎選乃近年以來有等僞稱道學鼓弄虛聲憑恃



與援獵取美秩於是恣行胸臆旁若無人  
敢於亂

祖宗之舊章敢於犯天下之公議蠱惑徒衆高  
自標榜論議紛紜防維決裂職業盡廢賄  
賂公行淫穢頑讒無所不有旣備諸醜仍  
得高陞人莫敢何自爲得計士習爲之大  
壞惡黨從而效尤不止一林大春而已也  
若不嚴行查處將來何所止極合咨都察  
院轉行各撫按衙門戒諭各提學官務要  
恪遵憲制勉樹表儀公以取人不得濫等  
於非類勤以閱卷不得假手於屬官敢有  
倡僞言以惑士聽爲僻行以敗官常不惜  
名節致干清議者卽便叅奏究斥如或容  
隱本部訪出一併叅究庶人心知畏學政  
可與隆慶四年六月初九日題十一日奉  
聖旨是林大春着閑住

覆都給事中光懋叅知州等官張求可  
等疏



該吏科都給事中光懋等題稱趙州知州張求可於隆慶三年三月以知府才力不及降補今職迄今一年零五月矣尚未赴任卽其事已屬故違原其心尤爲欺慢此當革職南京禮部精膳司郎中蔡茂春於隆慶三年十一月捧進四年

正旦表文到京計當回任之期迄今八月矣尚爾優游桑梓名節不檢昔嘗濡足豪門已不齒於士論今復縱情淫蕩益見鄙於鄉評此當從重究處再照兩京赴任還任官員其所至之日有無與殊限相違該衙門按季咨報稽查各省陞任調任官員自此之彼原有水程去處亦量加以水程之半以息告擾以後不拘進

表陞遷除授各官到任違限一體照例叅究等因奉

聖旨吏部知道欽此欽遵爲照赴任過限近例甚嚴張求可蔡茂春在家坐待陞轉久不



赴任欺怠自恣全不畏法其蔡茂春素行卑污官常已壞尤難律以違限之例既經該科查叅前來相應通行酌議合候

命下將張求可照違限例革任致仕蔡茂春照不謹例冠帶閑住仍通行在內在外各衙門今後凡遇赴任還任官員務要嚴查硃限按季類報應叅奏者照例叅奏應提問者徑自提問具由報部以憑查考其各省陞調官員原有水程所在酌量遠近量添水程不得仍舊紛紛告改憑限倘有該衙門回護違限不行類報及日久不開缺者聽本部及該科叅奏處治等因隆慶四年八月二十一日題二十三日奉

聖旨是張求可着致仕蔡茂春冠帶閑住

覆南京科道交論江西科場事變叅提學副使陳萬言等疏

該南京禮科等科署科事兵科給事中李崧等南京何南等道監察御史王嘉賓等



各奏稱隆慶四年江西鄉試提學副使陳萬言考取科舉遺失甚多巡按御史劉思問於八月初一日在省考選遺才衆至三萬八千餘人本官漫無籌策一聽都指揮王國光令人呼噪攔打以致生儒擁倒蹂踐卽時死者四十八人次日死者十七人蓋因陳萬言不能虛心考校闕卷昏庸品文顛倒釀成今日致傷多命又生員胡汝煥劉應旂俱南昌縣知縣劉紹恤門下友也情意深密凡事交通紹恤取入科場彌封考卷胡汝煥等卷已塗抹批落下第紹恤悉爲粧點欺蔽臨榜更易皆得中式關係重大不敢隱默乞將御史劉思問副使陳萬言降調知縣劉紹恤罷斥胡汝煥劉應旂革斥王國光處治等因俱奉

聖旨吏禮二部知道欽此欽遵過抄送司查得隆慶四年十一月內該江西撫按官李一元等各題稱江西提學副使陳萬言親老



病篤已經本部覆奉

欽依回籍侍養訖今該前因查呈到部看得南京科道官李崧王嘉賓等各奏論江西鄉試科場事變異常要將提學副使陳萬言巡按御史劉思問降調南昌縣知縣劉紹恤罷斥都指揮王國光等處治中式舉人胡汝煥劉應旂革斥各一節除知縣劉紹恤與舉人胡汝煥等事情該禮部查議外爲照江西告考生儒至稱三萬八千之多豈果皆是遺才但中式有遺才之半則陳萬言考校欠精可知其各生儒不候點名突入乃在御史未至之先安能預料而禁制之乎至於王國光等目擊其事趨行趕打致多踐踏之傷雖非有意責實難追合無除御史劉思問免究外副使陳萬言俟親終起送到部之日照才力不及例量調簡僻都指揮王國光等移咨巡撫衙門提問具



奏定奪其取卷一節行准禮部咨稱科場取  
士惟文是憑內外關防最爲嚴密本部於  
嘉靖四十三年開題奉

世宗皇帝欽依行令各省鄉試揭曉之後卽將  
中式舉人硃墨原卷解部以便稽查正慮  
事後或有物議於今日者得據此以辨真  
僞耳據論二生若果文義或疵塗抹有迹  
卽知縣徇私之弊亦復何辭今備將前卷  
仔細評閱外簾墨卷並無一字塗抹粧點  
則劉紹恤心迹似無可疑內簾硃卷各有  
考官親筆批點則舉人胡汝煥等文藝實  
有可取所據二生中式事體似難別議合  
將原卷送閱施行等因咨部送司併呈到  
部爲照

國家至公之典莫大於科場而年來防範加  
嚴尤難通弊若劉紹恤果係潛通關節私  
中胡汝煥劉應旂則文義必疵踪跡難掩  
豈惟紹恤等之罪而御史監臨之責寔亦



難逃今據禮部咨稱劉紹恤心亦無疑胡汝煥等文藝可取則舉人胡汝煥劉應旂委難議革唯劉紹恤身爲縣令乃於平日招致門生出入公衙私相宴叙既有以啟鑽刺之徑亦有以開嫌隙之門則今日之事雖非有私而謗訕之興亦豈無自合無將劉紹恤亦照不及事例量調簡僻以示懲創以爲守令私受門徒之戒恭候

命下移咨都察院轉行彼處撫按衙門查照施行等因隆慶四年十二月二十日題二十一日奉

聖旨是

覆給事中賈三近劾官疏

該吏科左給事中賈三近糾劾前因欲將原任直隸開州知州陞南京戶部員外郎今考察才力不及湯希閔革職爲民提問原任真定等府巡按御史今陞陝西苑馬寺少卿黃襄原任直隸大名府知府今聽



降丁憂姚汝循原任開州知州歷陞廣東  
布政司右叅議今丁憂張世仁俱罷斥等  
因奉

聖旨吏部知道欽此欽遵爲照湯希閔嘉靖四  
十四年七月內除開州知州至隆慶二年  
六月內陞南京戶部員外郎曾與兩次考  
察近該本部查得歷年考語俱優前後撫  
按諸臣槩未論劾但訪之輿論僉謂其處  
王田一事過當然年久未發又恐當時事  
出有激故特姑降處以照懲創今右給事  
中賈三近得于訪聞復詳指其破城王氏  
及諸貪酷之狀若果如此罪豈止于降級  
其章世仁假手復讐情由須見明白黃襄  
姚汝循旣係共事一時難免徇情偏聽但  
王氏之受禍事尚未明亦難遽處旣經言  
官叅論前來相應酌擬合候

命下咨都察院轉行彼處巡按御史將湯希閔  
行提到官查照該科所叅事理追究原斷



王田情罪因何卽致死地及妻子孫曾否  
計逼以絕其類諸凡貪酷踪跡有無證佐  
可指逐一研審明白查照律例定擬罪名  
及章世仁有無受意黃襄姚汝循應否併  
究通行勘實明白徑自回奏以憑再加酌  
議施行隆慶五年二月初一日題初三日  
奉

聖旨是

復巡城御史王元賓緝獲鑽刺犯人孫

五等疏

該巡視中兵馬司廣西道監察御史王元  
賓題先該巡視東城監察御史杜化中題  
爲申嚴盤詰之令以杜奸萌以安京師重  
地事奉

聖旨近來無籍棍徒潛住京師奸弊多端地方  
官全不譏察好生怠玩這所奏依擬通行  
五城御史嚴加盤詰拿究敢有容隱的一  
體治罪不饒欽此欽遵抄出送院備劄到



臣臣卽嚴行中兵馬司盤訐去後續據該司緝獲孫五等七人併鑕刺打點私書申報到臣臣卽批司究報隨據該司申稱犯人一名孫五卽孫用供年四十五歲直隸松江府華亭縣人狀供五先年與未到官漢陽府知府孫克弘父爲家人後五積有田產見得涂閣下位居首相勢焰逼人將原主背訖就不合故違投克勢要之家作爲家人名色事干嚇騙財物情重者問發邊衛充軍事例將田產等項值銀一千五百餘兩進獻徐府克爲家人改名徐五徐府隨給銀二萬餘兩在原籍開張典當舖面違禁多取以圖專利一方亦有在官華亭人朱堂王忠并脫逃沈信沈究學各年月不等亦不合故違投克撥置充軍前例陸續投入徐府朱堂改爲徐堂沈信改爲徐信并同在官雇工人唐艾領不在官徐璠本銀二萬餘兩王忠改爲徐忠沈究學



改爲徐寃學與同在官蔡元張恩王忠沈  
耀領徐瑛本銀一萬八千餘兩俱於

東安門外假以開張布店爲由倚勢在京營  
求重利比徐閣下被論去官回籍因在京  
店舖頗有厚利將徐堂徐忠等并資本仍  
畱在京照前營利不行收止又假此百計  
內外鑽刺打點希圖起用往來探報消息  
并將原籍人攔阻不得計奏有顧紹沈元  
亨投遞各衙門揭帖爲證徐閣下回至原  
勘該府因徐府請囑延緩未給顧紹復來  
京奏訴徐府聞知復差五來京阻勸顧紹  
并求起用以壓人心凡有所用銀兩俱於  
徐堂徐忠二舖內取用比五行至徐州撞  
遇孫克弘朝

覲回還問五徐府差你去京何幹五密向本  
官說稱我與徐府幹事等語比孫克弘畱  
五住宿五却又不合乘機故違指稱內外  
大小官員名頭并各衙門打點使用名色



誑騙財物者發邊衛充軍事例向孫克弘說稱我

內府識認官多與此銀兩打點轉陞孫克弘亦不合聽從五又稱說前任漢陽府知府王曾陞河東鹽運使見今河東運使正缺可求陞此官如不得時遼東苑馬寺少卿亦可克弘當寫稟帖一封禮束二箇并銀二百兩與五齋至

京師餽送親識轉囑求陞五接受訖本年三月初五日到京投石碑衙衙未到官陳忠家住歇忠亦不合容留顧紹等奏訴事情五與再三講說許與銀二千兩息詞有回書存照其孫克弘銀兩原係誑騙况且仕路清明求囑無由五將前銀五十兩先行奢侈浪費餘銀一百五十兩寄頓沈信處徐堂徐信徐忠徐寃學唐艾并夥計蔡元徐恩卽張恩徐祿卽馬六沈耀及脫逃徐四相公卽童儒徐山卽張山徐二卽張二



徐文錦卽朱文錦徐襄卽繼志吳應試夏  
珍見得五刑跡可疑訪知五騙使緣由各  
又不合向五挾銀二十四兩均分訖稟帖  
禮東存照又有不在官同鄉沈元亨亦將  
徐府奸貪用賄夤緣罪狀來京奏理五等  
又不合潛將沈元亨本詞奪回見追在官  
可證本月十二等日五密具稟帖央不在  
官王文峯張賓溪二次稍報徐府知會四  
月二十八日五又用計噴圈顧紹問蒙中  
籍專倚五爲心腹日每交歡仍前求利不  
息有在官省祭官顧紹嘉靖四十三年十  
二月內蒙松江府批差管押顏料銀三千  
五百兩運至挑河口堆放不在官張銀家  
被徐恩與未到官徐增延等意圖誑騙各  
不合故違各處起運軍需等項不拘起運  
存留但有包攬誑騙不行完納者事發問  
罪責限三箇月以裏完納者照常發落過  
期不完者儘其財產陪納發邊衛充軍經



年不完者仍枷號一箇月照前發遣事例  
撥置未到官徐琨攬侵通同未到官積商  
侯坤不合將銀肥已經今年久推延不納  
以致累死伊父顧萬監併伊妻子不肯將  
張恩等撥置受賄投獻田產影射差糧舉  
放私債致死人命奸占良家妻女包侵各  
項錢糧不法事情具奏聞徐堂等欲行攔  
阻紹因恨深未允奏

准勅行戶部移行撫按衙門轉行松江府查  
兵馬司掌印王兵馬會同孔兵馬遵奉近

### 日題

准訪拿在京打點鑽刺事例緝知五前項事  
情差在官番子可文等將五捉獲隨於五  
身搜出前項稟帖書稿及騙孫克弘前銀  
除挾分并置買衣服花費外見在原銀一  
十八兩一併拘追在官研審五通將張恩  
朱堂等一十六名潛住

京師黃綠打點起用前情供出及審顧紹面



執被五等阻投各衙門許發寃情揭帖當  
蒙差人將張恩朱堂蔡元王忠沈耀馬祿  
唐艾等七名捉拿到官面對各情輸服無  
詞徐寃學等九名聞風將前銀一百五十  
兩拐帶各又不合懼罪脫逃訖徐顧紹等  
奏許徐府違法事情戶部已經催行彼處  
撫按查勘徑自歸結不供外將五等所犯  
研審明白所供是實連人伸解到臣覆審  
情詞的確除將孫五等抄供送問外爲照  
湖廣漢陽府知府孫克弘由官生冒濫至  
知府已爲非望乃因舊家人孫五等鑽刺  
求陞河東運使等官此蓋其垂涎運司係  
財稅所聚欲便其私圖耳臣見其稟帖情  
詞卑污甚至號呼不知所求何人爲父母  
而不知耻則其居官之闕茸狼狽可見於

此矣尚望其承流宣化長一

方以長教耶

例屬故違法當叅寃叅照漢陽府知府孫  
克弘本以匹夫濫竊郡守尚昧止足之分



妄萌僥倖之心罔思

明例之爲嚴但知錢神之可恃謂他人父謂他人母全是乞鬻之態一求運司再求苑馬真成隴斷之謀卽其鑽刺之通天可卜官箴之掃地所不可一日覩顏民上者也  
伏乞

聖明勅下吏部將孫克弘

特賜罷斥庶僥倖之輩有所懲清介之士益自勵而吏治爲有裨矣再照原任大學士徐階往事其忠與否皆

皇上所照鑒臣不敢具論以竇

聖聰獨思

皇上篤念舊臣放歸田里亦可謂優厚而無負於階矣爲階者當闔門自懼恬靜自養可也夫何自廢退以來大治產業贖貨無厭越數千里開舖店於

京師縱其子攬侵起解錢糧財貨將等於內帑勢焰燻灼於天下武斷鄉曲包魚然可畏



以致鄉人顧紹等訐奏尚不知省復令孫  
五等故違

明旨潛住

京師強阻奏詞探聽消息各處打點廣延聲  
譽跡其行事亦何其無大體也臣讀漢書  
見楊惲失爵位內懷不服驕奢不悔過起  
室治產以財自娛卒致敗亡以階所爲寔  
大類此苟迷而不返自生厲端是使

皇上不得終其篤舊之仁而奉法之吏必任矣

臣竊爲階惑之再乞

皇上勅旨戒諭

天語嚴重俾令省圖恬靜山林滅跡

朝市以終餘年度

君恩臣度可保全終始而

朝廷亦共享和平之福矣等因奉

聖旨吏部知道欽此欽遵抄出送司案呈到部  
除孫五等事情聽法司問結奏

請外看得巡視中兵馬司廣西道監察御史



王元賓題稱湖廣漢陽府知府孫克弘鑽  
求陞官乞要罷斥一節爲照孫克弘不思  
聖世清明乃敢妄圖鑽刺官常不謹已可槩觀  
法紀甚嚴自難輕貸旣該御史王元賓叅  
論前來相應議擬合候

命下將孫克弘姑照素行不謹例冠帶閑住以  
爲質緣求進者之戒仍咨行該撫按衙門  
查照施行等因隆慶五年五月十八日題  
二十日奉

聖旨孫克弘着冠帶閑住

覆給事中宋之韓叅官疏

該吏科左給事中宋之韓題叅福建右布  
政使熊琦入

賀不敬山西行太僕寺寺丞何凌霄至京不  
朝且操守盡壞乞要罷斥等因奉

聖旨吏部知道欽此欽遵爲照熊琦冒越班行  
何凌霄引

見不到誠爲有罪然止係失悞比之查鐸孫枝



不肯入

賀者不同遽難重擬其熊琦失盜之事亦難  
加罪至謂其才力暗庸操守有議則與本  
部查訪相同且夙稱多病乖錯周張亦難  
蒞事何凌霄年老才庸貪聲素著先任通  
判時曾經巡撫李尚智劾其龍鍾委靡不  
堪府佐今年益衰而守逾肆罔牧之寄又  
豈能堪既經該科叅劾前來相應議處合  
候

命下將熊琦照有疾例致仕何凌霄照不謹例  
冠帶閑住員缺各另銓補隆慶六年二月  
十五日題十七日奉

聖旨熊琦着致仕何凌霄冠帶閑住

覆給事中周芸等劾官疏

該戶科等衙門左給事中等官周芸等題  
叅薊州知州喬梁良鄉縣知縣王瑋各闕  
茸無能乞要降調閑散等因奉

聖旨吏部知道欽此欽遵爲照知州喬梁知縣



王瑋不能稽查驛遞錢糧任其冒破反爲  
回獲欺隱以滋奸弊旣經科道叅劾前來  
卽宜重處但查各官歷考喬梁考稱事不  
要名政先節省王瑋考稱兩任縣令一紙  
不收操守未壞不可遽棄相應酌處合候  
命下將喬梁王瑋俱照才力不及例起送赴部  
調用員缺各另揀擇銓補隆慶六年閏二  
月初六日題初八日奉

聖旨是

終



